

A C T I T U D E S

LAS FLAMAS DE LO FOGARIL

POr VEREMUNDO MÉNDEZ COARASA

*!Qué altas que puyan las flamas,
en las nuestras chamineras,
cremando fáus y caxicos,
buxacos y ramas secas!
Fan relucir los follins,
de cientos de fumateras,
fendo chuegos, cullebriando
por lo canaril, que a preba,
ye metiu, en cien añadas,
aguantando ixas fogueras,
sin quexarse, ni tartir,
que, tanto fuego lo crema.
Lumbre roya y blanquiñosa,
toda la cocina emplena,
fendo achiquir lo tederu,
en do se crema la tielda
u a la luz de la bombilla,
que a darla blanca, no i-plega;
relucen los caminals,
los puchés y las cazuelas,
los cercillos de ferradas,
las polidas espederas
y las baldosas, fregadas,*

mas limpias que la patena.
 Las flamas, chisporrotiando,
 ven fendo cayer ta tierra,
 muitas purnas y purnallos,
 que lo fogaril replega.
 Cayen por mils las bolicas
 de cenisa y fán por tierra,
 motiando, muitos adornos,
 como la nién fá por fuera.
 Los güellos te s'encandilan
 fito a fito ta la leña,
 que, ardiendo, fa mil figuras
 y más de arder, te calienta.
 Las bolicas que te cayen,
 las segudes enta tierra,
 pero no apartas los güellos,
 de la leña que se crema,
 ni de las flamas, que puyan
 altas, por la chaminera.
 Una nuey, recién cenáus,
 mirando las flamas yeran,
 prexinando cada cual,
 u pensando a su manera,
 rodiando lo fogaril,
 toda una familia entera,
 en aquella nuey d'ivierno,
 que l'ausin chiflaba fuera,
 chelando a la niéu, que empliba,
 los telláus y las carreras.
 Yeran bién aposentáus,
 en dreita y zurda cadiera
 y cara a cara lo fuego,
 bellos, en escamilletas,
 escuitando, que lo güelo.
 fablaba d'estas maneras:
 A mi, porque ya so viello,
 muita vida no me queda,
 pero a éstos fogarils
 y polidas chamineras,

que, por cientos, las añadas,
todas, u cuasi, las cuentan,
a morir son condenadas,
como yo, por estar viellas.
De caxicos, de buxacos,
de fáus... ¡Qué güenas bagueras,
los fogarils consumiban,
en todas las casas chesas!
En las nueys de Navidá,
en otras que febas veila,
u por matar los cochins,
heban que moler especias.
Cuando se feba colada;
cuando la casa «creceba»,
cuando la casa «menguaba»
y en muitas vispras de fiestas.
Ya no s'aguantan las chéns,
que por debán se calientan,
lo chelarse por dezaga,
que las balda y las amuela.
Ye muito lo que se gasta,
si has que carriarte la leña
y más agún si la compran,
los que carriarla no puedan.
Agora no bi-há otra cosa,
que esperdicios de la sierra,
pino, abete y fáu, mulláus,
que la güena, la se levan,
por dar algo de triballo,
por un zarpáu de pecetas.
¡Qué caras que han a costar,
si espulláus, los móns, se dexan!
La vida que ve trayendo,
con lo tiempo, cosas nuevas,
fa aquí, como en otros puestos,
que muitas cosas se pierdan.
Levan calzón, cuatro viellos.
Ya se'n fueron las gorgueras.
Rondas no'n sientes dinguna;

ilo tañer, ye una fatera!
¿Bailar la jota? ¡Soniando!
¡Xo, antis más, diz que feban.
Albadas y palotíaus,
romances y sobremesas,
iz que cien años te zaga,
aquí'n lo lugar, bi-n-beba.
Agora lis ve tccando
la vez a las chamineras,
que no n'ba quedar dinguna,
ni p'amostrarla pa muestra.
'Ab, mal empleáu lugar,
emplíu de cosas tan güenas;
cómo lo tiempo, traidor,
te ve dexando sin d'ellas!
Ya no tartié mas lo güelo;
miré lo fuego que ardeba
y lo altas que puyaban,
las flamas, la nuey aquella.
Poco a poco se apagueron,
como si s'besen dáu cuenta,
de lo que d'ellas fablaba
y s'besen muerto ide pena!

